

Diabierna awor, dia 4 di november 2005 pa 5'or di atardi

Biblioteca Nacional y Fundacion Papiamente ta presenta un mundo magico di buki

13 "Festival di buki di mucha 2005" ta cuminsa!



ORANJESTAD – Hokus Pokus, Abracadabra, Simalabim: di diabierna 4 di november te cu diabierna 11 di november 2005, bo lo seucha e palabranan aki tur caminda unda tin buki di mucha na Aruba – na cas, na scol, den Biblioteca Nacional, den tur libreria... Un siman largo Aruba lo wordo getover den un isla MAGICO!

E di 13 Festival di Buki di Mucha e aña aki ta carga e tema: MAGIA...

Y pensa bo bon... No ta asina cu cada buki ta magico? Con por ta cu ora bo ta lesa un buki – papel cu ink riba dje ta transforma bira un pelicula den bo cabes? E escritornan conoce e secreto aki, y abo tambe, si bo por lesa of skueha bon. Palabra por tover tur sorto di mundo bo dilanti.

E autornan (y contado di cuento) cu lo participa den e Festival di Buki di Mucha 2005 di Aruba ta: Liliana Braamskamp-Erasmus, Desiree Correa y Dolfi Kock, di Korsou ta Laura Quast y grupo di teatro Paradox, di Boneiro ta Gabriël Mercera y di Hulanda ta Mariska Hammerstein, Sjoerd Kuyper y Daniëlle Schothorst. E autornan lo ta bishitando e scolnan di Aruba, Biblioteca Nacional Oranjestad y San Nicolas durante e siman di 7 pa 11 di november.

Diabierna awor, dia 4 di november 2005 pa 5'or di atardi, Biblioteca Nacional y Fundacion Papiamente lo presenta un mundo magico di buki, di lesamento, di teatro, di musica... pa henter Aruba disfruta di dje. Na unda? Na Biblioteca Nacional na Playa. E programa di e apertura di e Festival di Buki di Mucha 2005 ta yen di triki y sorpresa spectacular e biaha aki. Tur aña un scol lo presenta un obra cu ta carga e tema di e festival. E aña aki ta Mon Plaisier Basisschool tin e honor pa entretene e publico cu un tremendo show di magia y sorpresa. Grupo Paradox di Korsou lo deleita e muchanan cu un presentacion unico y yen di fantasia den e sala di actividad di Biblioteca Nacional. Naturalmente e mercado di buki ta primordial durante e apertura di e Festival di Buki di Mucha, pero e aña aki cumpramento di buki tin un balor special. Ya cu pa prome biaha den historia di Festival di Buki di Mucha, e Regalo di Festival di Buki di Mucha lo wordo introduci na Aruba. Na Hulanda e Kinderboekenweekgeschenk ya ta un fenomeno conoci y exitoso pa locual ta trata e mundo di lesamento.

FUNDACION PAPIAMENTE
Fundacion Papiamente pa

promer biaha lo co-organisa e Festival di Buki di Mucha hunto cu Biblioteca Nacional. "Si ta stimula nos kier stimula lesamento na Aruba, nos mester introduci e Regalo di festival aki. Kico por ta mas efectivo cu stimula compra di buki y lesamento na e manera aki? Ken no lo kier un buki colorido y di calidad completamente gratis ora nan cumpra un buki di mucha pa nan yiu of nan mes? E siguiente paso ta pa e regalo aki wordo lesa. Pero, ya e ta den e kashi di buki caba y esei ta mas leu cu si e keda den tienda...", segun Liliana Braamskamp-Erasmus di Fundacion Papiamente. E prome Regalo di Festival di Buki di Mucha aki lo wordo introduci durante e apertura di e festival cu ta diabierna awor, dia 4 di november. E buki lo keda



un misterio te ora cu e wordo revela na e publico diabierna. Un cos ta sigur, e tema di e buki ta MAGIA... y cu cada compra di un buki di mucha na balor di 20 Florin of mas bo ta ricibi e Regalo di Festival di Buki di Mucha aki completamente gratis. E ta obtenibel den tur libreria na Aruba.

Biblioteca Nacional di Aruba y Fundacion Papiamente kier a gradici tur e magonan cu a colabora e aña aki pa e Festival di Buki di Mucha 2005 por bira un realidad. Danki na Stichting DOEN, CEDE Aruba, Prins Bernhard Cultuurfonds

Nederlandse Antillen en Aruba, Antraco Aruba Group, Aruba Lions Club, Advocatenkantoor Kloes & de Cuba y De Veer & Son pa nan formula secreto. Mayornan di Aruba, korda cu boso yiunan no por tover nan mes na e apertura diabierna awor dia 4 di november. Tampoco boso por tover e ora pa bai bek... 5'or e Festival di Buki di Mucha 2005 ta cuminsa. Y no lubida e formula secreto ... ora bo cumpra un buki di mucha durante e evento aki, un otro buki ta aparece completamente gratis!